

## DODIS MIL E CUATRICENT "FURLANS"

Cumò lu savìn: in Friûl a son ancjemò dodis mil e cuatricent "furlans". Prin di cumò no si veve idee: si scrupulave che a fossin ancje mancul. I voltegabanis dai gjornâi locâi a scrivevin che si jere in cuatri e che chest sfuei lu leievin dome chei cuatri che lu metin adun. E noaltris, biâts, no si veve mût ni maniere di contrastâ lis statistichis dai sarasins di elezion.

Nus è capitade pes mans une ocasion di fâ un fregul di censiment: une biele ocasion, parcè che, inte balfuerie de campagne eletorâl, tal bordel dai comizis e des predicjîs, tal scjadenâsi di dutis lis fuarcis e di dutis lis furbariis, inte strassarie di peraulis e di milions, il risultât che o vin puartât fûr al è dal sigûr un risultât tamesât, purgât de bule, de semule, de vece e di ducj i sporchets. Dodis mil e cuatricent a son i furlans (e lis pocjîs furlanis) che si tegin in bon di jessi furlans, che no crodin aes cjacaris, aes peraulis gruessis, ai smaniaments, aes sflocjîs dai sermonârs di ducj i colôrs; dodis mil e cuatricent a son i furlans cence risiervis.

Cheî altris che, a peraulis, cualchi volte si proclamìn furlans, a metin la lôr furlanetât inte code, daûr di cent mil altris cabulis e di cent mil interès forescj, di cent mil pôris, di cent mil ambizions e di cent mil luianiis; cheî altris, nassûts sot paron a bramin di restâ sot paron, sclâfs dai forescj e sfrutâts di dutis chês sanguetis che ur sclagnissin lis venis fevelant di patrie, di democrazie, di civiltât, di redenzion dal proletariât, di difese dai "valôrs spirituâi" (par talian: tacuins e careghins). Cun dodis mil e cuatricent eletôrs il Moviment Popolâr Furlan nol à vîncût nuie: ma nancje nol à mai pensât di vinci. Al à fat un scandai, par viodi se, fintremai cumò, al veve lavorât dibant, se verementri la semence nostrane e tignive dûr ancjemò o se e jere dal dut disvidrignide: il risultât al mostre che il nestri çoc al resist e lis lidrîs a son sanis.

Dodis mil e cuatri cent di lôr a son pôcs e une vore: al dipent di ce bande che si cjale: a son pôcs se si pense che dibot mieç milion di altris residents in Friûl a jan dât il lôr vôt a le une o a le altre des tantis ideologjîs cence costrut che a formin l'urdît e la trame de vueide e dispossente politiche taliane; a son une vorone, se si pense che, par clamâsi furlans, tra il berghelâ di dutis lis ocjîs dai partîts di cumò, e vûl une buine misure di indipendence morâl, di inteligjence positive e di francjece, e che il Moviment Popolâr Furlan nol à fate nancje la centesime part di sfuarçs e des spesis che i partîts organizâts a jan podût fâ. Al è rivât adore juste di meti fûr cualchi flic di manifest par fâ savê cuâl che al jere il so simbul eletorâl!

O vin viodût cualchi centenâr di vôts pal "Cjavedâl" in cualchi paisut lontan,  
indulà che nissun di nô veve metût pît, indulà che nol jere comparît sui mûrs  
nancje un dai nestrîs manifescj. Chescj dodis mil e cuatricent a son umigns;  
chês altrîs cuatricent o cincîcent mil a son schedis.

josef marchet - Patrie dal Friûl / 1951